

Txirritola

ARAMAIO / Barikua / 2003ko urriaren 17a / 81. zenbakia

KOORDINATZAILEA: Ubane Madera • Otolara Lizentziaduna 31 20500 ARRASATE • Tel.: 943 71 25 11 • Faxa: 943 71 23 89 • Posta elektronikoa: txirritola@goiena.com • Lege gordailua: SS.1084/02

Antzerki saioa izango da Txirritola Eguna ospatzeko

UBANE MADERA

Urterokoari utsiz, Txirritola Eguna ospatuko du Txirritola Euskara Elkarateak. Aurten apurtxo bat atzeratu, eta oraingo asteburuan izango da: bihar gauean, hain zuzen ere.

Txirritola Egun berezia izango da aurtengoa. Berezia edo, behintzat, desberdina. Izan ere, aurten, ohiko bazkaria egin barik, antzerki saioa antolatu du Txirritola Euskara Elkarateak Txirritola Eguna ospatzeko. Hain justu ere, Vaiven Producciones taldearen *Lotsa-Gabe* antzezlanaren ekarriko dute Aramaiora.

Bihar antzeztuko dute lan hori, 22:00etan hasita, kultura etxean. Sarrerak bost euro balio du.



Lotsa-Gabe
Felipe Loza eta Garbi Losadarena

Bereziki 15-18 urteko nerabeei zuzendutako lana da *Lotsa-Gabe*.

GAZTEENDAKO SAIOA

Sexu heziketa du berba *Lotsa-Gabe* antzezlanak. Hain justu ere, gazteei sexologiaren inguruan egunero sortzen zaizkien zalantzak lantzen ditu, besteak beste. Hala, hiesa, anorexia, homosexualitatea, beldurrak, lotsak, eta holako gaiak aztertuko dituzte.

Jende guztiari zuzendutako lana da, baina bereziki 15 eta 18 urte arteko nerabeei; haiendako

sexu heziketaren gaineko gida izan daitekeen komedia moduan aurkez daiteke.

ANTZERKI SARIA

Horrez gainera, esan beharra dago ikuskizun ezaguna dela *Lotsa-Gabe*. Besteak beste, Donostiako 2002ko Antzerki saria jaso zuen.

Ana Pimentaren ideia originalean oinarritutako lana da. Tes-

tuak Felipe Lozak eta Garbi Losadadak idatzi dituzte eta Nagore Aranburuk egin du itzulpena. Bestalde, Jon Calvo, Getari Etxegarai, Miren Iburguren, Gorka Otxoa, Maider Yabar eta Dorleta Urretabizkaia gazteek osatzen dute aktore taldea.

Oro har, hausnarketarako eta dibertitzeko aukera paregabea dago bihar, batez ere gazteendako.

ARTXIBOA



Jende gutxi baina giro polita

Xabier Alustiza gailendu zen *rallysprint*-eko proban. 18 minutu eta 7 segundoan bukatu zuen ibilbidea; bigarrenari, Txema Uzkuduni, 21 segundo atera zizkion eta hirugarrenari, Luis Mari Azkunerri, 24 segundo. Irabazleak 400 euroko saria eraman du. Antolatzaileek kontatu digutenez, uste zuten baino jende gutxiagok hartu zuen parte, egun berean Urbasako proba egin zuten-eta. Dena dela, 1.000 lagun inguru erakarri zituzten Aramaiora.

HERRITARRENHITZA / Yago Goronaeta • Langilea

Boloak eta pilotalekuak (Bowling for colombine)

eta bueno, oraingo honetan Oscarra irabazi duen ● ● ● azkeneko dokumentalaren gainean berba egin behar dizuet. Gogoratzen duzue haren errealizadorea estatuatxoa harzen eta Bushen eta haren politikari militarren gainean luze eta zabal berba egiten ikusleen txistualdiaren erdian? Haren izena Michael Moore da eta pare bat orduan jarlekuan itsatsita eduki ninduen dokumentalaren errealizadorea da; Coloradoko Littlel-tongo Columbine High Schoolen gertatutako sarraskia dramatikoaren gainekoa da. Armatuta sartu ziren bi ikaslek andereño bat eta hamaika ikasle erail zituzten.

Balak erraz asko lortu zituzten, merkataritzagune batean.

Moorek galdera batzuk egin zituen:

Zergatik Ameriketako Estatu Batuetan urtero 11.000 lagun hiltzen dira su-armek eraginda? Horren desberdinak dira AEBak eta gainerako herrialdeak? Zertan desberdintzen da?

Zergatik AEBak dira horrenbeste indarkeriaren eragile eta biktima? Dokumentalean zenbait argudio ageri dira;



“Zer egin diezagukete beldurraren erruz?”

autoreak oso tinkoak ez diren argumentu ingeniosoenkin baztertzen ditu. Poliki-poliki diskurtsoaren emaitza aurkezten du.

AEBetan hurkoaren mesfidantza handia dago (are handiagoa azal zuziduna ez bada); mesfidantza hori beldur bihurtzen da; eta beldur horrek su-

arma gehien dituen herrialdeko biztanleak nork bere defentsarako edozein instrumenturen jabe gitegera behartzen ditu. Beldurra

eragiten digun hura hil egin ohi dugu-eta gizakiok.

Bidean gurutzatzen den sugogorria ikusiz gero, hiltzeko gogoia sentitzen dugu, sorrarazten digun beldurrak eta nazkak eraginda. Beldur hori gure baitan dago, baina ez digu balio gizartean bizitzeko. Izugarriena da beldur horiek gizartearen zati direnean. Gizarte alemana juduen beldur zen eta ez zen haiekin fidatzen; hala, ia-ia desagertu egin ziren juduak.

Horrelakoak pentsatzen, honakoak bururatzen zaizkit: zer egin genezake beldurraren erruz? Zer egin diezagukete beldurraren erruz?

LABUR

Erretiratuen Egunerako txartelak salgai

Datorren zapatuan, hilak 25, ospatuko dute aurtengo Erretiratuen Eguna. Besteak beste, bazkaria antolatu dute herriko erretiratuendako. Eta bazkarira joateko, txartelak erosi behar dira alde aurretik. Hala, Aramaioko Udalak jakinarazi digunez, auzoetan auzo alkateek dituzte txartelak eta Ibarra udaletxean, Vital Kutxan edo Euskadiko Kutxan erosi daitezke. 6 euro balio du. Bazkaria pilotalekuan izango da, eta ostean musika saioa egongo da.

TELEFONOJAKINGARRIAK

OSASUNA / LARRIALDIK

Osasun etxea (bandak)	945 44 53 40
Botika	945 44 50 03
Udaletekoa	945 44 50 16
Ertzaizta (Arrasate)	943 79 71 99
Gurutze Gorria (Legutio)	945 45 52 52
San Martin Eskola	945 44 50 04
Taxia eta autobusak	945 44 50 33
Udal kiroldegia	945 44 53 35
Postetxea	945 44 50 83
Zuako Eskualdea	945 43 01 67
Suhiltzaileak (Zubillaga)	943 78 28 00

AUTOBUSORDUTEGIA

ARRASATE	ARAMAIO	GASTEIZ
07:00	07:15	08:00
10:00*	10:15	
11:00	11:15	
12:00*	12:15*	13:00
15:15	15:30	16:15
17:20	17:35	
18:30*	18:45	
20:30	20:45	21:25
21:00*	21:15	

GASTEIZ	ARAMAIO	ARRASATE
	07:50	08:05
08:15	09:00	09:15
	10:15*	10:30
	11:15	11:30
13:10	13:55	14:10
16:20	17:05	17:20
	17:35	17:50
	18:45*	19:00
19:30	20:10	20:25

OHARRA: izartxoak duten orduetan eskaeraren arabera zerbitzua eskaintzen dute. Auzoetako bizilagunei zuzendutakoa da, eta autobusa erabili gura badute, bezperan deitu beharko dute honako zenbaki honetara: 629 54 59 23

OHARRAK

DANTZA TALDEAREN OHARRA

Lagun Artean dantza taldeak jakinarazi digunez, 12 urtetik gorako dantzariak behar dituzte taldean, nagusien dantza-taldea osatzeko. Ainara Inuntziaga arduradunak esandakoaren arabera, neskak eta mutilak, biak hala biak behar dituzte. Hala, interesa duenak Sastiñara joan beharko du bihar, zapatua, 16:30ean. Jendea animatzeko, Ainara Inuntziagak dio dantza taldeak aukera handiak ematen dituela kanpora ateratzeko, herriz herri ibiltzeko; eta oso ondo ibiltzen direla. Badira hiru urte nagusien dantza talderik ez dagoela.

MARGO LEHIAKETA

Domekan egin zuen Itur Zuri elkarteak urteroko Margo Lehiaketa. Eta esan beharra dago irabazleen artean aramaior bat dagoela. Hain zuzen ere, Izar Elortzak aurreneko saria eskuratu zuen 16 urtetik beherakoan artean. Bigarren Lide Mar Barrutia izan zen. Nagusien artean, berriz, Juan Jose Altunak irabazi zuen eta Aitor Lajarin izan zen bigarren.

Mozio bat eta larregizko ur-kontsumoa berbagai

UBANE MADERA

Datorren eguaztenean, 18:00etan, osoko bilkura egingo dute. Landuko dituzten gaien artean, homosexualen gaineko mozio bat izango da; baita ere gehiegizko ur-kontsumoaren gaineko ordenantzen aldaketa. Azkenaldian izan diren kontsumo handiegia ekititeko egingo dute.

Udaleko teknikariek emandako informazioaren arabera, azkenaldian ezohiko ur-kontsumoa sumatu dute uren sarean. Bi hilean 300 m³ kontsumitu ei du erabiltzailearen batek; litrotan 300.000 litro ur da kopuru hori. Besteren batek 100 m³ kontsumitu ei ditu. Eta kontsumo horiek arrazoitu barikoak izan dira; hau da, ur hori ez dute erabili ganadutarako edo antzerako beharretarako, baizik eta erabilera pribatua egin dute (igerilekua betetzeko...).

Hori ikusita, osoko bilkurari proposatuko diote larregiko kontsumo horiek zigortu egin behar dituztela. Hala, 100 m³-tik gora egiten den ur-kontsumoarengatik, betiere arrazoitu barikoa bada,

ohiko prezioa baino dezente garestiago ordaindu beharko dute erabiltzaileak.

HOMOSEXUALEN GAINEKO MOZIOA

Bestalde, pertsona homosexualen adopzio eskubideen gaineko mozioa ere aztertu beharko du udalbatzarrak datorren eguazteneko bileran. Mozio horrek gay eta lesbianen duintasun eta berdintasun eskubideak berresten ditu, eta haiekiko bereizketa bortitza gorde gura duten zenbait indar integristaren erreakzio homofoboa salatzen du (George W. Bush, Joseph Ratzinger kardinala...). Bereziki, Partidu Popularrak homosexualen oinarritzko eskubideak galarazteko duen gogo nabarmentzen du mozioak. Hala, eskatzen du Partidu Popularrak ken dezala Izatezko Bikoteen Legearen aurka jarrita dituen helegiteak; aitor dezala bikote homosexualak adopziorako duten eskubidea eta errespetu daitezela joera homosexualak duten pertsonen giza-eskubideak.

Kontuak kontu, batzarra datorren eguaztenean denez, ez dugu jakiterik zein erabaki hartu duen udalbatzarrak.



Etxean erabilitako olioak batzen hasiko dira laster

UBANE MADERA

Etxean erabilitako olioak batzen hasiko dira laster. Gero olio hori birziklatzera eramango dute. Ibarrean, bestelako herri guztietan batzen dute olioak, Mankomunitatearen eskutik. Aramaion, olioak batzen hasi aurretik, olio-bidoiak gordetzeko txabola konpondu egin behar dute.

Orain arte, etxean erabilitako olioak arraskatik behera bota izan dugu gehienok. Baina, itxura denez, hori egitea uste baino arrisku suagoa da. Izan ere, arraskatik ibaira doa olio hori, eta ibai-ko landaretzari eta izakiei oxigenoa kentzen die. Horrez gainera, arazo praktikoak ere

ematen ditu, hodiak buxatzen ditu-eta olioak.

Gauzak horrela eta jakinda olioak berriro erabili daitezkeela, arraskatik botatzea baino hobe da birziklatzea. Eta Aramaion laster hasiko dira hori egiten.

TXABOLA KONPONDU BEHAR

Baina olioak batzen hasi aurretik, batutako olio-bidoiak gordetzeko lekua txukundu behar dute. Izan ere, Udalak erabaki du kiroldegira bidean dagoen txabolatxoak erabiltzea horretarako. Hala, lanok egiteko lehiaketa egin dute, eta jasotako proposamenen artean, Elusu enpresak egindakoa aukeratu du Udalak. Horren arabera, 1.700 euro inguru inbertituko dute lanok egiteko. Hortaz, dagoeneko esleitu dute proiektua.



Untzillan eta Barajuenean lan handiak egin behar izan dituzte instalazio elektrikoetan.

Auzoetan egiten dituzten etxeekin lotutako lanak

UBANE MADERA

Auzoetan etxe bat eraikitzen dutenean sortzen den argindar gastua horren handia ez izateko bide berriak aztertzen dabil Udala. Hain justu ere, oraingoz, orain arte moduan segituko dute, baina aztertuko dute ea udal ordenantzek tasa berrir bat zehazteko aukera ematen duten.

Orain arte, baserri-auzoetan etxe bat egin ez gero, etxe berriak argindarra izan dezan lan handiak egin behar izan dituzte baten baino gehiagotan (Untzillan, Altzagan eta Barajuenean). Izan ere, auzoetako instalazio elektrikoak zaharrituta daude, eta zabaltze-lanak egin behar izaten dituzte. Baina horrek kostu handia izan ohi du.

Orain arte, kostu hori etxea eraiki duenak ordaindu izan du. Udalak badu hitzarmen bat egiteko aukera. Haren arabera, etxea eraiki den auzoko instalazio elektrikoan egindako lanak bost urte baino lehen beste norbaitek apro-

betxatuz gero, pertsona horrek gastatutako diruaren zati bat itzuli egiten dio etxe-eraikitzaileari.

Kontuak kontu, Udalak uste du etxe-eraikitzaileak ordaindu beharrekoa larregikoa dela. Hori dela eta, Udaleko ordezkariak Jaurilaritzan egon berri dira, Industria eta Energia Saileko Angel Cachorro teknikariarekin. Eta proposatu diote gaur egun dagoen legea ez erabiltzea. Baina Aramaioko Udaleko teknikariek kontatu digutenez, ezezko erantzuna jaso dute Jaurilaritzatik. Hortaz, lehengo moduan segituko dute oraingoz.

TASA ALDATZEKO AUKERA

Hori ikusita, orain, Udaleko teknikariak beste aukera bat aztertzen dabilta: egin gura dutena da argindarra erabiltzearen kobratzen den zerga hori garestitza (alta), eta hortik eskuratzeko diruarekin instalazio elektrikoak zabaltzeko lanak ordaintzea. Udal ordenantzek hori egiten uzten duten aztertuko dute orain, eta gero, osoko bilkurari proposatuko diote.

LABUR

Camerata Gasteiz taldeak kontzertua emango du datorren barikuan, hilak 24

Erretiratuen Eguren bezperan, Sabin Salaberrik zuzendutako Camerata Gasteiz taldeak kontzertua emango du. Kultura etxean izango da, 21:00etan. Corelliren, Vivaldiren, Purcellen, Häendelen eta Bachen musika interpretatuko dute. Hala, Vivaldiren kantuan, François Moncierok biolontxeloa joko du; Häendelen kontzertuan, Pablo Martinez Espartzak tronpetak joko du; eta Bachen kontzertuan, Agusti Coma eta Victor Parra bakarlariek ekitaldia egingo dute.

Hari-tresnekin osatutako taldea da Camerata Gasteiz. Hain justu ere, hamalau hari-tresna ditu oinarri. Taldearen zuzendari Sabin Salaberrik esandakoaren arabera, orain dela gutxi sortu zuten, 2003ko urtarrilean, hain zuzen ere, baina hala eta guztiz ere, dagoeneko kontzertu ugari eskaini ditu Arabako bazterretan. Gasteizko Jesus Guridi kontserbatorioko zenbait irakasle, ikasle eta ikasle ohik osatzen dute taldea eta ganbera-orkestra antza du.